

**Ai 9 di novembar**  
**INTE DEDICAZION DE BASILICHE DAL LATERAN**  
**Fieste**

La Basiliche dal Lateran, catedrâl de Glesie di Rome, fate fâ di Costantin ai temps di Silvestri I (314 – 335), e je ritignude mari di dutis lis glesiis de Urbe e dal Orbe. L'aniversari de sô dedicazion, celebrât par vieri dome a Rome, si comemore in dutis lis comunitâts di rît roman.

Inte basiliche stesse si dîs la Messe dal Comun de dedicazion de glesie (p.). [\(I\)](#)

**Antifone di jentrade Cf. Ap 21,2**

O viodei la citât sante, la gnove Gjerusalem,  
a vignâjù dal cîl, di Diu,  
prontade tant che une nuvice che si furnìs pal so nuviç.

**O ben: Cf. Ap 21,3**

Ve la tende di Diu cui oms! Lui al starà framieç di lôr,  
e lôr a saran il so popul, e lui al sarà il Diu cun lôr.

**Si dîs Glorie a Diu.**

**Colete**

Diu, che cun pieris vivis e sielzudis  
tu preparis pe tô maiestât une cjase eterne,  
multipliche inte tô Glesie  
il spirt di gracie che tu nus âs dât,  
par che il to popul fedêl  
ch'al fâs sù la Gjerusalem dal cîl, al cressi simpri di plui.  
Pal nestri Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

**O ben:**

Diu, che tu ti sêis indegnât di clamâ la Glesie tô nuvice,  
fâs che la int ch'e servîs il to non  
e vedi timôr di te, ti vueli ben, ti vegni daûr,  
e, cu la ô guide, e rivi ai bens dal cîl che tu i âs imprometûts.  
Pal nestri Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

**PRIME LETURE 1 Re 8,22-23.27-30**

I tiei vòi ch'a restin spalancâts sun cheste cjase.

Dal prin libri dai Rês

In chei dîs, Salomon al restâ in pîts denant dal altâr dal Signôr in face di dute la semblee di Israel. Al alçà lis mans viers dal cîl e al disè: «Signôr, Diu di Israel! Nol è nissun Diu a pâr di te ni adalt tai cîi ni cajù su la tiere, tu che tu sêis fedêl al pat e che tu mantegnis il to bonvolê cui tiei fameis cuant che a cjaminin cun dut il lôr cûr denant di te.

Ma Diu starail pardabon cui oms su la tiere? Ve che i cîi e i cîi dai cîi no rivin a tignîti; ancjemò mancul cheste cjase che jo o ai fate! Scolte la preiere dal to famei e la sô supliche, Signôr gno Diu: scolte il berli e la preiere che il to famei al fâs vuê denant di te! I tiei vòi ch'a restin spalancâts dì e

gnot sun cheste cjase, sun chest lûc che tu âs dit: Li al sarà il gno non. Scolte la preiere che il to famei al fasarà in chest lûc.

Scolte la supliche dal to famei e dal popul Israel cuant che a prearan in chest lûc. Tu scoltiju dal lûc che tu sêts a stâ, tal cîl, scolte e perdone».

Peraule di Diu.

### **SALM RESPONSORIÂL Dal Salm 94**

**R.** Adorin il Signôr inte sô cjase sante.

Vignît, batîn lis mans al Signôr,  
fasin fieste a la crete che nus pare;  
presentînsi denant di lui ringraziantlu,  
fasin fieste cun cjantis di ligrie. **R.**

Parcè che il Signôr al è un grant Diu,  
un re grant, sore ducj i dius.

Tes sôs mans a son lis fondis de tiere,  
a son sôs ancje lis spicis des monts plui altis.  
So al è il mât, parcè che lu à fat lui,  
lis sôs mans a an poleade la tiere. **R.**

Vignît, butînsi a schene plete  
denant dal Signôr che nus à créâts,  
parcè che al è lui il nestri Diu,  
e nô, il popul che lui al passone,  
il trop de sô malghe. **R.**

### **SECONDE LETURE 1 Pt 2,4-9**

**Ancje vualtris, tant che pieris vivis, lassaitsi doprâ par fâ sù une cjase spirituâl.**

De prime letare di san Pieri apuestul

Benedets, tacaitsi daprûf di lui, pierre vive, butade di bande dai oms ma sielzude e preseade denant di Diu. Ancje vualtris, tant che pieris vivis, lassaitsi doprâ par fâ sù une cjase spirituâl, par jessi predis sants, in mût di podê ufrî sacrificis spirituâi che Diu al à agrât midiant di Gjesù Crist. Di fat al è scrit: “Ve che jo o met in Sion une piere di cjanton, sielte, preseade, e chel ch’al crôt in jê nol restarà malapaiât”.

Onôr duncje a vualtris ch’o crodês: ma par chei che no crodin “la piere che i muradôrs le vevin butade di bande e je deventade un cjantonâl, un clap che si inçopedisi e une piere ch’e fâs colâ”. Lôr s’inçopedin parcè che no crodin a la peraule; al è il lôr distin. Vualtris invezit o sêts la “gjernazie sielte, i predis e i rês, la int sante, il popul che Diu si è cuistât par ch’al conti lis grandis voris” di lui, che us à clamâts dal scûr a la sô lûs sflandorose.

Peraule di Diu.

### **CJANT AL VANZELI Cf. Zn 4,23-24**

**R.** Aleluia, aleluia.

Ve, al e rivât il temp che i vêrs adoradôrs  
a adoraran il Pari in Spirt e veretât.

**R.** Aleluia.

### **VANZELI Zn 4,19-24**

**I vêrs adoradôrs a adoraran il Pari in Spirt e veretât.**

Dal vanzeli seont Zuan

In chê volte la femine samaritane i dîs a Gjesù: «Signôr, o viôt che tu sêts un profete. I nestri vons a an adorât sun cheste mont e vualtris o disêts che al è a Gjerusalem il lûc là che si à di adorâ». I dîs Gjesù: «Crodimi, femine, che e ven un’ore che no adorarêts il Pari ni sun cheste mont ni a

Gjerusalem. Vualtris o adorais ce che no cognossê; nô o adorin ce ch'o cognossin, parcè che la salvece e ven dai gjudeos. Ma e ven un'ore, anzit e je cumò, che i vêrs adoradôrs a adoraran il Pari in Spirt e veretât; e di fat il Pari al va a cirî int cussì che lu adori. Diu al è Spirt e chei che lu adorin, a an di adorâlu in Spirt e veretât».

Peraule dal Signôr.

Cuant che cheste fieste e cole di domenie, si dîs O crôt.

### Su lis uiftis

Acete, Signôr, il regâl che ti ven presentât  
e a di chei che ti prein  
daur di ricevi in chest lûc la fuarce dai sacraments  
e il compiment dai lôr desideris.  
Par Crist nestri Signôr.

### Prefazi

*Il misteri de Glesie, nuvice di Crist e templi dal Spirit*

V. Il Signôr cun vualtris.

R. E ancje cun te.

V. Adalt i cûrs.

R. Ju vin viers il Signôr.

V. Vin agrât al Signôr nestri Diu.

R. Al è just e sacrosant.

Al è propit just e sacrosant, al covente e al da salvece  
vêti agrât simpri e dapardut,  
Signôr, Pari sant, Diu onipotent e eterni:

Te tô munificence tu ti indegnis di vignâ a stâ tun lûc di preiere  
e, cul jutori de tô gracie che mai nol mancje,  
tu fasis di nô il templi dal Spirtu Sant,  
splendent di lûs pe vite buine dai tiei fîs.  
Ma tu santifichis cence polse ancje la tô Glesie,  
nuvice di Crist e prefigurade in lûcs visibii,  
par che come mari in gjonde pe sdrume de sô fiolance  
e puedi rivâ inte tô glorie tai cîi.

Par chel, cun ducj i Agnui e i Sants,  
ti laudin, disint cence polse:

Sant, Sant, Sant al è il Signôr Diu di dut il mont...

### Antifone a la comunion Cf. 1 P 2,5

Ancje vualtris, tant che pieris vivis, lassaitsi doprâ  
par fâ sù une cjase spirituâl, par jessi predis sants.

### Daspò de comunion

Diu, che cul spieli de tô Glesie di ca jù

tu âs volût prefigurâns la Gjerusalem dal cîl,  
fâs, ti preìn, che partecipant a chest misteri  
o podedin deventâ ancje nô templi de tô gracie  
e jentrâ inte cjase de tô glorie.

Par Crist nestri Signôr.

Si pues doprâ la formule de benedizion solene, pp.